



REPUBLIKA E SHQIPËRISË
ENTI RREGULLATOR I ENERGJISË
BORDI

VENDIM

Nr.27, Datë 16.02.2023

MBI

**ÇMIMIN E APLIKUESHËM TË BLERJES SË ENERGJISË ELEKTRIKE QË DO T’U
PAGUHET PRODHUESVE EKZISTUES ME PËRPARËSI ME HYRJEN NË FUQI TË
VKM-SË NR. 67, DATË 08.02.2023**

Në mbështetje të nenit 16 të ligjit nr. 43/2015, “Për sektorin e energjisë elektrike”, i ndryshuar, nenit 10 të ligjit nr. 7/2017 “Për nxitjen e përdorimit të energjisë nga burimet e rinovueshme”, nenit 113 të ligjit nr. 44/2015 “Kodi i Procedurave Administrative të Republikës së Shqipërisë”, VKM-së nr. 67, datë 08.02.2023 “Për një ndryshim në Vendimin nr. 687, datë 22.11.2017 të Këshillit të Ministrave, “Për miratimin e Metodologjisë për përcaktimin e çmimit vjetor të blerjes të energjisë elektrike, që do t’u paguhet prodhuesve ekzistues me përparësi”, të ndryshuar” dhe nenit 15 të Rregullores për organizimin, funksionimin dhe procedurat e ERE-s, miratuar me vendimin e bordit të Entit Rregullator të Energjisë (ERE) nr. 96, datë 17.06.2016; Bordi i ERE-s, në mbledhjen e tij të datës 16.02.2023, pasi shqyrtoi relacionin me nr. 736/2 prot., datë 14.02.2023 të përgatitur nga Drejtoria e Tarifave dhe Çmimeve, “Mbi çmimin e aplikueshëm të blerjes së energjisë elektrike që do t’u paguhet prodhuesve ekzistues me përparësi për vitin 2023, në zbatim të ndryshimeve të miratuara me VKM-në nr.67, datë 08.02.2023”,

Konstatoi se:

- Bordi i ERE-s me vendimin nr. 327, datë 14.12.2022, vendosi miratimin e çmimit vjetor të blerjes së energjisë elektrike, që do t’u paguhet prodhuesve ekzistues me përparësi prej 8.5652 lekë/kWh për vitin 2023.
- Në vijim të kësaj vendimmarrjeje, me VKM-në nr. 67, datë 08.02.2023 “Për një ndryshim në Vendimin nr. 687, datë 22.11.2017 të Këshillit të Ministrave, “Për miratimin e Metodologjisë për përcaktimin e çmimit vjetor të blerjes të energjisë elektrike, që do t’u paguhet prodhuesve ekzistues me përparësi”, të ndryshuar”, Këshilli i Ministrave vendosi që niveli maksimal i çmimit të llogaritur të blerjes së energjisë elektrike, në çdo rast nuk do të jetë më i lartë se çmimi 10 lekë/kWh (pa TVSH)”.

- Në zbatim të VKM-së nr. 687, datë 22.11.2017, e ndryshuar, formula e llogaritjes së çmimit vjetor të blerjes së energjisë elektrike që do t'u paguhet prodhuesve ekzistues me përparësi është: “Çmimi vjetor i blerjes (lekë/kWh) = Çmimi mesatar vjetor i tregut të ditës në avancë (HUPX/DAM) i energjisë elektrike në profilin bandë (baseload) i vitit përkatës të bursës hungareze (HUPX) të energjisë elektrike në euro cent/kWh X bonusin për promovimin e burimeve të rinovueshme në masën 1.20 X normën mesatare të këmbimit në euro/lekë për vitin e fundit”.
- Në vijim të ndryshimit të miratuar me VKM-në nr. 67, datë 08.02.2023, çmimi rezultues është mbi nivelin maksimal të çmimit të llogaritur të blerjes së energjisë elektrike të përcaktuar në gjermën “d” të VKM-së nr. 687, datë 22.11.2017, e ndryshuar, prej 10 lekë/kWh.
- Në VKM-në nr. 67/2023 është përcaktuar hyrja në fuqi e tij, pas botimit në Fletoren Zyrtare. Rezulton që ky Vendim është publikuar në Fletoren Zyrtare nr. 21, datë 09.02.2023.
- Në mbledhje mori pjesë dhe përfaqësuesi i AREA-s, i cili kërkoi që ndryshimet në VKM-në nr. 67, datë 08.02.2023 të aplikohen që nga data 1 Janar 2023 si dhe nëse nuk aplikohen nga ky muaj u kërkua nga ERE t'i kompesojë kostot shtesë të shkaktuara, në përputhje me ligjin nr. 43/2015 “Për sektorin e energjisë elektrike” i ndryshuar. Nga ERE iu shpjegua se ligji nr. 43/2015 në nenin 47, pika 8 shpjegon sesi mund të kryhet kompesimi i kostove shtesë të shkaktuara për kryerjen e shërbimit publik, pas evidentimit të tyre.
- ERE me anë të postës elektronike, më datë 10.02.2023 ka njoftuar OSSH sh.a. dhe OST sh.a., për dijëni dhe FTL sh.a., për hyrjen në fuqi të VKM-së nr. 67, datë 08.02.2023, duke i kërkuar operatorëve të marrin masa të menjëhershme për zbatimin e VKM-së dhe leximin e menjëhershëm të aparateve matës të energjisë elektrike të prodhuar nga prodhuesit ekzistues me përparësi, me qëllim reflektimin e saktë të sasisë së energjisë elektrike të prodhuar gjatë muajit shkurt 2023, deri në momentin e hyrjes në fuqi të VKM-së nr.67/2023.

Për gjithë sa më sipër, bordi i ERE-s,

Vendosi:

1. Miratimin e çmimit të aplikueshëm të blerjes së energjisë elektrike që do t'u paguhet prodhuesve ekzistues me përparësi, prej 10 lekë/kWh.
2. Efektet financiare të këtij çmimi fillojnë nga data 09.02.2023 me publikimin në Fletoren Zyrtare të VKM-së nr. 67/2023 e deri më 31.12.2023.

3. Me hyrjen në fuqi të këtij vendimi, vendimi i bordit të ERE-s nr. 327, datë 14.12.2022 “Mbi miratimin e çmimit vjetor të blerjes së energjisë elektrike që do t’u paguhet prodhuesve ekzistues me përparësi për vitin 2023”, shfuqizohet.
4. Drejtoria e Tarifave dhe Çmimeve, të njoftojë palët e interesit për vendimin e bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes dijeni, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARI
Petrit AHMETI